

四庫全書

史部

欽定四庫全書

欽定平定臺灣紀略卷十二

四月初一日

戊戌

徐嗣曾奏言自興化泉州馳抵厦

門一帶察看緊要口岸即汙港紛岐處所亦皆派撥員弁帶領兵役梭織巡查

臣

又隨處傳集濱海

耆民及鴻中漁戶面加獎勸該居民等咸知踴躍現復據漳浦縣羅澤坤稟報盤獲臺灣逃回匪犯林壬即陳壬一名解赴督臣李侍堯審辦

臣

於三

月十四日回至省城擬將一切事件速行趕辦再赴緊要口岸親往搜拏又因調派廣東兵四千名由廈門蚶江分渡會勦臣昨往來泉州將應行事宜面同督臣商酌督臣擬赴廈門一帶巡查即料理粵兵東渡臣巡閱口岸亦以興化泉州一帶為最要計粵兵之由蚶江前進者正在其時臣即暫駐蚶江督率照料務俾妥速飛渡俟粵兵開船後趕回省城辦理秋審及一切事件亦不至悞至於

應需糧餉等項布政使伍拉納及鹽法道戚蓼生
現在泉州隨同督臣辦理已節次委員齎銀前往
接濟臺灣本係產米之區一面委員就地採辦一
面運米前赴支放仍令各屬動碾倉穀運貯泉州
聽候撥用藥鉛等項亦已籌備充裕奏入報

聞

初二日

己亥

上命軍機大臣傳諭常青李侍堯曰康熙年間奸民朱

一貴聚衆滋擾經提督施世驃統領大兵悉由廈門
進剿不及一月即已收復歲功蓋因大兵會合一路
由廈門進攻聲威壯盛賊匪望風膽落故能一舉殲
滅此次賊匪起事之初黃仕簡任承恩領兵進剿分
路配渡其餘將弁又各由別路陸續進發已覺兵勢
稍分伊二人一抵臺灣即應彼此會合厚集兵力直
搗賊巢將首惡擒縛餘黨自必瓦解乃黃仕簡任承
恩僅派撥將備零星打仗四處堵禦以致賊匪從而

生心得由山徑繞道蔓延各處嘯聚官兵轉為所牽
掣兵分而力見單幸而賊匪不過么麼草竊並無謀
計設遇狡黠奸徒逞其鬼域伎倆豈不又蹈木果木
之覆轍耶著常青抵臺灣後即將各路官兵調集會
合一處其添調粵兵遵照前旨全歸常青統率以期
兵威壯盛士氣振奮專力全赴賊巢搜勦斷不可又
蹈黃仕簡任承恩故轍輕分兵力觀望遲延俾賊匪
得以四散牽掣戡事致稽時日也

初三日

庚子

黃仕簡奏言總兵郝壯猷柴大紀等馳

赴南北二路勦匪郡城為全臺根本不可無大員

彈壓且附郡之大穆降本縣庄岡山羅漢門等處

介在南北之中均離府城不遠各處有賊匪往來

出沒

臣

親督官兵居中堵禦搜捕并為兩路軍兵

接應聲援此在郡未敢遽離之情形但

臣

前奏未

能詳細聲明實屬糊塗之至迨諸羅鳳山先後克

復賊匪復於附近村庄潛聚滋擾

臣

派撥官兵嚴

密擒捕而諸羅之大武壠礁吧咩各庄仍有匪黨
聚集該處山路最為險峻現在整兵進剿日內督
臣常青到臺灣臣即親率官兵到處勦捕掃除之
後隨赴諸羅督同總兵柴大紀進攻斗六門水沙
連等處繼至彰化會同總兵普吉保等攻勦大里
杙賊巢務期生擒逆首林爽文解京究辦併勦盡
匪夥斷不敢稍有遷延觀望自取罪戾至臣染患
風症前在內地時發時愈自到臺灣因機務焦迫

心神倍加恍惚氣力日見頽憊惟念職任海疆只當竭盡駑駘是以未敢將症病據實奏明茲節次

欽奉

上諭訓飭

臣

感激涕零悚惶無地惟有躬率士卒奮勉

勦匪淨盡根株以期剋日蕝事

同日李侍堯奏言官兵前往臺灣勦捕逆匪所有糧餉等項固須接濟無悞尤防冒濫多支致將來按例報銷或至追賠懸宕

臣

於到任後即飭司查

核茲據伍拉納彙查自上年十二月起至臣到任

以前共撥藩庫銀三十三萬餘兩臣意用兵未久

何至如許之多及閱所開各款有鹽菜等項例應

支給者有預支俸餉等項數月內即可扣還者有

過兵地方借領以應差務將來除核銷外應繳還

者亦有解往臺郡備用正在途次該道府具稟時

尚未接到者緣倉猝調兵務期迅速應付以利遄

行且臺郡遠隔重洋往返動需時日不得不多為

預備是以動撥較多但近據臺灣等縣開報雇用夫價等項已有例不准銷者臣以軍務緊急之時固不便一一駁核致地方官轉得藉口或至貽悞但一任濫付將何所底止隨即嚴行檄飭將來著落賠補外仍一面通飭各屬嗣後一切款項均須查照部頒軍需則例動支其則例所未載而事在必需如海運水脚等項則酌量先行應付其餘概不得濫給庶軍務無遲悞之虞而帑項亦不致有

多糜之弊至臺灣府縣本各有倉庫其三縣雖已殘破而府城保守無虞尚應實貯據藩司查明府庫應存銀二十五萬餘兩倉穀應存十二萬餘石乃接據臺灣道府稟稱銀穀俱已用盡並未將作何動用之處詳悉開報隨嚴飭該道府等逐一查明到日核辦現值軍務緊要自當先以接濟糧餉為急臣惟有隨時酌量應付以期無悞昨據署臺灣府楊紹裘稟稱逆匪林爽文與各賊黨將大里

杙一帶掘濠放水復築土牆安設砲位是現在賊黨方盤踞穴巢併力拒守未經大創斷不肯自行潰散則此時尚不慮逸匪竄入其附船入口者類多被難之人窮無所歸思回本籍而各口岸兵役藉有稽查之名遇此等渡海來者留難勒索難保其必無是以臣嚴飭各員務宜分別良歹不得藉端擾累現據各口岸委員盤獲數起如逃兵汪中鯉等四名臣已按律辦理其餘被難之人檄令各

州縣訊明如確有證據立即釋回庶奸匪不致倖
逃而難民亦不致受累至將來攻破賊巢時匪黨
四散逃入內地者必多尤當上緊擒捕毋使一名
漏網又不得以此中或有難民稍存姑息又提
任承恩委弁押解賊目林家齊一犯前來咨稱該
犯係逆首林興文族長去冬曾誑哄彰化文武官
願將林興文帶來投到以致猝不設備釀成巨案
等因

臣

查該犯既係林興文同謀之逆黨自應解

京審訊隨派委巡檢程鏜把總姚世貴將該犯押解於二十日起程均奏入

上命軍機大臣傳諭常青李侍堯曰黃仕簡不過因遷延日久連奉諭旨嚴飭為此飾詞以掩其退縮之罪幸而朕先事預籌派令常青前往督辦黃仕簡得有所藉口若使朕不派常青前抵臺灣黃仕簡又將何辭豈竟思久坐郡城以待賊之自斃乎況林爽文既歸巢穴其餘附近賊匪不過么廝草竊如易連陳邦

光等皆可堵截搜捕又豈專賴提督大員坐擁重兵以防其復來滋擾之理即總兵柴大紀郝壯猷等收復二縣城後自應統領官兵直抵大里杙賊巢奮勇勦除乃該鎮等即以防守為名並不上緊追捕截拿任其竄伏團聚以致賊匪得以繞道蔓延官兵轉為所牽掣是該鎮等效尤觀望畏蒞不前即郝壯猷之罪亦與柴大紀之失陷城池漫無籌畫者不相上下現據李侍堯奏逆匪林爽文與各賊黨將大里杙一

帶掘濠放水復築土牆安設砲位等語賊黨盤踞穴
巢以圖併力拒守看其光景別無他圖竄匿之計轉
可聚而殲戮其事尚屬易辦恐大兵雲集四路圍攻
賊匪計窮力蹙或竄入內山希圖苟延殘喘搜捕轉
稽時日不可不預為籌辦著常青抵臺灣後即將各
路官兵調集會合一處揀派精銳親行帶領直赴大
里杙奮力圖勦務將首惡林興文一鼓擒獲餘黨殲
除淨盡其堵截賊後路不使竄入內山一事專派柴

大紀帶兵在內山路口嚴密堵禦並著常青詳悉曉諭柴大紀伊係臺灣總兵致賊滋事失陷城池已屬有罪之人且收復諸羅後效尤觀望其咎亦與黃仕簡任承恩無異念其從前守禦郡城尚屬出力姑令帶罪圖功現在大兵進剿賊匪竄入內山之路最關緊要即責成該鎮專力堵截若能將賊首拏獲餘黨不使一名竄逸不但宥其前罪並當仍錄其功倘再不能實力奮勉立功自贖以致賊首林爽文從伊防

守之地竄逸及餘匪復有逃入內山等事則惟柴大紀是問恐伊不能當此重罪也再據李侍堯奏附船入口者類多被難之人而各口岸藉有稽查之名不無留難勒索等語綠營此等惡習實為可惡俟事竣後當嚴查處治以示懲儆又臺灣倉儲庫貯額數不為不多府城又復保守無虞何以未及數月即已用盡地方遇有此等事件該處官員即使各出已貲設法防護亦所當然況閭巷小民尚有好義急公之舉

若地方官竟有藉辦軍需為名浮用冒銷飽其私橐
則是天良昧盡即立置重典亦所應得但現在正值
會兵進剿之時若遽行查辦恐伊等各懷畏懼辦公
更多觀望著常青李侍堯俟事竣後徹底嚴查如果
有侵欺情弊即嚴叅重治想昧良之輩天理難容亦
無所逃罪也

初四日

辛丑

常青奏言二十三日至廈門登舟因春

令北風甚少在料羅寄旋三月初六日風順開洋

初九日由澎湖進鹿耳門登岸抵臺灣府城面晤
提臣黃仕簡即以欽奉

上諭與看令其回奏並詢以勦賊機宜黃仕簡語言不
甚明白更兼步履艱難是病憊屬實及臣接見在
城員弁訪問臺灣近日情事復悉心體察勦捕事
宜詎料與該提督等從前咨報迥不相符緣臺灣
地廣人稠游手者衆自逆首林爽文攻縣戕官各
處奸徒皆效尤搶劫然大兵初到賊衆聞風逃散

此時兩提臣乘其銳氣自有破竹之勢因黃仕簡

惟坐郡城任承恩惟守鹿仔港而分派鎮將亦皆

觀望遷延不思爭先賈勇臣在泉州時以重洋阻

隔盼望情殷聞收復彰化攻克諸羅而鳳山又尅

日可復臣一時忻幸意謂大勢已定即請將浙閩

兩省備用之兵撤回以省糜費今臣親至臺灣得

諸目擊始知彰化諸羅鳳山等縣被賊攻陷焚劫

已空而又以栽竹為牆無險足據故賊聞官兵將

至即捨城而爭險要之地官兵既已入城因即以克復城池咨報如柴大紀一到諸羅賊仍佔據斗六門使我兵南北兩路至今不通並聞普吉保帶兵前赴彰化中途被刦車輛則道路梗塞較前更甚任承恩帶兵由鹿仔港登岸後既不駐扎彰化縣城以逼賊巢又不與柴大紀夾攻斗六門惟知退守鹿仔港近聞賊人仍往來彰化城中是何得謂之克復至郝壯猷係正月間經黃仕簡派往南

路在大湖扎營月餘於二月二十一日據報克復

鳳山乃

臣

於三月初九日到臺灣之時已聞初八

日郝壯猷所帶兵丁二千餘名被賊沖散該總兵
及副將以下等員先後奔回止存敗殘兵四百餘
名又副將徐鼎士前到淡水未見寸功因距府路
遠尚無實信兩月以來折兵糜餉應請將遲悞之
提督黃仕簡任承恩總兵郝壯猷柴大紀普吉保
分別治罪

臣

在泉州不能覺察並請將

臣

交部嚴

加議處但黃仕簡患病衰頹在軍無益應令其仍
回廈門任承恩雖未能向前但北路避賊人民俱
在鹿仔港若遽撤動恐賊乘虛柴大紀雖不能將
斗六門一帶打通然上年在府城外堵禦尚屬奮
力普吉保係後到之員調往北路未久俱仰懇暫
令伊等帶罪督兵以觀後效至郝壯猷等自鳳山
敗回是否賊多兵少致被沖散抑係畏蕙脫逃並
前此鎮將等咨報克復縣城以及攻庄殺賊各情

節有無藉事鋪張容臣一併嚴查明確再行請

旨務令功罪分明軍威復振但臺灣賊匪從前止有逆
首林爽文王芬等數人從賊者亦止附近賊巢數
千人今則南路險要各處有賊首莊大田莊錫舍
王坑郎藍九榮陳靈光陳建平等北路險要各處
賊首林爽文之外又有陳泮吳領蔡福葉省等或
為林爽文羽翼或效林爽文所為自立旗號肆出
滋擾凡稍可踞佔之民庄盡為賊人所有惟府城

鹿仔港笨港沿海三五處亦屢有賊來攻擾尚能
共相保護故避難者偕來聚處但將來亦恐有人
滿乏食之虞而逆首林爽文等狡猾異常復將所
掠錢米廣為散給要結人心以致無食游民盡皆
從賊查臺灣額駐兵丁經三縣被陷傷亡已多尚
未據該鎮查報實數然約略存剩之兵似不堪用
其內地調到兵萬餘各路打仗又多損失當此賊
勢蔓延必須添調重兵方能痛加勦洗現在鳳山

復陷賊更鴟張已到府城十里之外臣派遊擊蔡攀龍帶兵往桶盤棧堵禦並督率道府永福楊廷樺同知楊廷理等各帶義民固守郡城可保無虞再令普吉保速與柴大紀夾攻斗六門以通南北之路飭署守備陳邦光保守鹿仔港催任承恩前赴彰化先將附近縣城賊夥殲除即相機攻檇林與文大里伐賊巢並飛檄徐鼎士會同署都司易連將北路新庄艋舺等處賊匪勦盡漸次自北而

南與任承恩會合併力搜捕此時不必僅以收復
空城為得計而必以爭據險隘攻搗賊穴殲擒賊
目為先除嚴飭提鎮副將等員各思激發天良出
力報効外一面飛咨督臣李侍堯將原備南灣金
門銅山海壇各營兵一千名再調同安營兵四百
名海壇鎮兵三百名金門鎮兵三百名又調原備
廣東兵三百名浙江兵二千名再挑幹練勇往之
遊擊守備等十員配舡渡海俱由鹿耳門進口會

齊臣即親自統領必不再行分撥致減兵力先儘南路鳳山縣境以至諸羅彰化淡水席卷而前務期將逆首林爽文並其餘賊目一併生擒不使賊一名漏網又查臺灣府城雖係挿竹為牆而各門城樓磚土砌就亦頗高大臣隨出城外細看地方形勢防範尚為周密謹將

恩旨蠲免臺灣府全屬本年地丁錢糧騰黃遍諭各處復傳喚士紳商民當面曉諭各紳士義勇人等莫

不感激踴躍現在府城內外街市貿易照常再查該提鎮等咨報克復三縣其彰化並無官兵駐守鳳山現已復陷惟諸羅一縣自柴大紀駐紮之後賊人尚知畏避居民亦漸次回歸臣因柴大紀不能打通南北道路是以一併叅奏但其能守諸羅非若彰化鳳山之既克而不能保守者可比是柴大紀功過原不相掩臣仍遵

旨先行嘉獎再觀後效又逆首林爽文前據該鎮稟聞

被砲打傷之語原無確據現聞大里杙庄一帶豎立旗號及偽帖告示寫有順天字樣並自稱盟主大元帥此等悖逆不法寸磔不足蔽辜至義民等獻出王芬首級係何人所殺是否真實義民等在先曾否附賊挑斷脚筋之楊禮等十一犯有無搶奪容臣逐一查明核辦

同日黃仕簡奏言二月初九日有南路弁兵紛紛來至郡城臣隨飭遊擊孫全謀詢問據稱初八日

賊匪從鳳山縣東南門放火擁入官兵接戰抵敵
不住以致衝散初十日總兵郝壯猷到郡據稱初
四日叅將瑚圖禮稟報自山猪毛被賊攔截不能
過溪該總兵派令遊擊鄭嵩帶兵六百名前往又
派官兵三百名接應午刻鄭嵩回稱行至硫磺溪
遇賊圍截衝散官兵未回甚多未刻賊匪來攻營
盤併攻縣城東門初六日該總兵將城外官兵移
駐城內初七日賊四面攻城初八日賊匪益見加

增攻城更急午刻賊由南面進城四處放火攻殺
以致官兵衝散等語查南路自克復鳳山總兵郝
壯猷等原帶官兵合計有三千餘名在該處防守
縣城足資堵禦接應何致賊匪衝散官兵現在督
臣常青於三月初九日到臺灣府城臣差查南路
官兵存亡確數另報統聽督臣查核辦理均奏入
上命軍機大臣傳諭常青恒瑞李侍堯徐嗣曾琅玕曰
據常青奏到臺灣後查明官兵遲悞據實指叅及添

調兵丁情形所辦俱合機宜惟任承恩身為提督乃畏蕙不前既不駐劄彰化縣城以逼賊巢又不與柴大紀夾攻斗六門其罪奚辭豈可復留該處再令帶兵仍滋貽誤著遵前旨將任承恩一併拿問解京治罪柴大紀一到諸羅不能將斗六門賊匪搜除淨盡開通道路實有應得之罪但前此守禦郡城尚能奮勉且駐劄諸羅後賊人頗知畏避居民亦漸回歸常青所稱該鎮功罪不相掩自屬公論所有陸路提督

一缺著加恩暫令柴大紀署理並著常青傳諭該鎮
令其戴罪圖功以觀後效若伊玩悞不前必當二罪
俱發至郝壯猷守衛鳳山即賊多兵少亦當效命捐
軀國家自有優恤乃竟棄城逃回怯懦已極軍律斷
難姑容已明降諭旨即於軍前正法以肅戎行其所
遺海壇鎮總兵員缺著常青於現在帶兵將備內詳
加體察實有奮勇出衆人員則不拘階級之崇卑即
奏請破格超擢以示獎勵如此賞罰嚴明自必人人

感奮可期鼓勇集事至常青現在飛咨添調本省及廣東浙江兵共七千名俱由鹿耳門進口會集即親自統領必不再行分撥致減兵力之處所見甚是粵東潮碣二鎮兵丁前據李侍堯等奏業經檄調四千名已較常青所調者多一千名於三月十六日自粵省分起起程即可陸續到彼至浙省兵向來柔懦更遑閩省且距閩稍遠此時徵調亦緩不濟急著傳諭琅玕竟可停止派撥現於常青原調兵數止少一千

名朕思福建駐防滿兵雖不能如京師健銳火器等營勁旅所向無前究屬心力堅定較之綠營恒怯尚為得力況常青曾任福州將軍駐防兵皆其舊屬呼應自靈著恒瑞於滿營內挑選一千名并派得力之協領佐領等官分起管帶恒瑞即親身統領前赴臺灣會合進剿所有兵丁口糧配渡各事宜即著徐嗣曾妥為料理其福建續調之綠營兵二千名即著藍元枚親身統領前往臺灣會剿內地亦不可無提督

彈壓所有水師提督事務著漳州鎮總兵常泰暫行署理現有粵省添調兵丁四千名及本省續調之內地官兵自己陸續至廈門會齊著李侍堯妥速料理即令其配渡常青於新調官兵未到之前固不宜冒昧輕進然坐待稽延恐賊匪又生別計亦非良策自應將現有官兵內詳加挑選擇其壯健者派令奮勇將備帶領先至南路鳳山一帶搜捕賊匪逐一殲除淨盡俾後路肅清將來大兵往北攻勦不致有反顧

之憂較為妥善至鳳山駐守兵丁三千餘名何至遇賊即行潰散現據常青奏先後奔回之兵止存四百餘名餘兵皆向何往豈有俱從賊之理著常青俟事定後嚴查為首之人從重辦理其現在退回之兵按照兵法俱應概予駢誅但念人數眾多究係領兵將弁不能首先奮勇以致兵氣不振姑暫貸其一死著常青明白曉諭該兵丁等令其激發天良奮勉自效上又諭內閣曰郝壯猷係派往南路勦捕大員既經收

復鳳山縣城自應一面派兵設卡防守一面親率將
弁追勦賊匪乃安坐營盤既聞瑚圖里被賊攔截不
即親往接應以致賊匪乘勢攻圍縣城復陷況該總
兵所帶之兵計有三千餘名當賊匪來犯時兵丁等
畏賊退避該總兵即應立時正法數人使知儆懼同
心抵禦何至紛紛潰散即或賊多兵少勢不能支亦
應奮不顧身殺賊而死甚至無能自刎庶不失城亡
與亡之義從前征戰緬甸時如明瑞觀音保扎拉豐

阿皆因綠營兵丁懼怯不能勝敵今日適有松潘鎮
總兵穆克登阿來京陛見經朕詢問據稱伊等在彼
跟隨明瑞等打仗目擊彼時情事將軍等非不可以
退出而明瑞等僉言受恩深重兵散勢窮寧死於賊
不死於法即或退出後倖邀寬典亦何忍覩顏視息
是以不肯生還等語朕聞其言猶欲為之墮淚明瑞
等能知大義咸以身殉其身後既邀優卹世職復予
專祠子孫至今受恩弗替歿有餘榮郝壯猷以專閫

大員寧不聞知乃亦效綠營兵丁恇怯惡習自罹重辟且日前因郝壯猷收復鳳山縣城尚為出力曾諭令常青查明如果郝壯猷堪勝提督即行奏明候朕簡放今似此畏怯倖生若不明正典刑其何以肅戎行而昭軍紀常青接奉此旨即將郝壯猷在臺灣郡城傳集衆將弁將伊正法並將前旨本欲用為提督及現在又因其棄城潛回是以按軍法從事各緣由向其宣諭俾知賞罰分明禍福惟其自取郝壯猷即

身伏刑誅亦當死而無怨至瑚圖里身係滿洲前於賊匪滋擾鳳山時乘馬馳歸郡城已有應得之罪第念其究因倉猝兵散所致與自行脫逃者有間是以仍令帶罪效力今據黃仕簡奏該叅將又於山猪毛地方被賊攔截不能過溪若係賊人踞守溪河險隘尚屬可原倘竟係該叅將畏懼賊勢借詞躲避亦如郝壯猷之逃回則其罪更無可逭著常青即查明此次瑚圖里如果有畏葸逃回情事亦即一面奏聞一

面將該叅將正法示衆至柴大紀普吉保姑念其從
前奮勉現今帶罪自贖暫著從寬交部嚴加議處以
觀後效常青從前率據黃仕簡等咨報冒昧入告咎
亦難辭但念其遠隔重洋未能得知確信且該督現
在臺灣督辦本日奏到各摺悉合機宜常青著加恩
免其議處此事現交常青督辦常青即著授為將軍
恒瑞藍元枚著授為叅贊俾事權歸一軍威益振以
期迅奏蕩平綏靖海疆

上又諭內閣曰前因李侍堯奏南北兩路提督各有牽掣不免坐費時日已降旨將任承恩革職拿交刑部治罪黃仕簡撤回廈門候旨矣伊二人抵臺灣後並不親臨行陣定期會攻一南一北互相觀望果不出朕所料以致賊匪日久蔓延迄今未能撲滅其玩延貽誤厥罪維均即或黃仕簡因年老患病不能親身帶兵及任承恩到彼後不能不零星堵禦抑或賊匪衆多兵力實有不敷勦辦之處伊二人早應隨時據

實直陳候朕指示籌辦乃伊等並無一字奏及是其種種貽誤實無可置喙而黃仕簡係水師提督臺灣乃其專轄現在勦捕事宜又經朕特交督辦乃如此畏葸因循更無怪任承恩之意存推諉其罪視任承恩為尤重任承恩既經革職拏問黃仕簡亦難予寬宥昨已降旨將黃仕簡撤回內地俟伊到廈門時著李侍堯即傳旨將伊一并革職拿交刑部治罪所有福建水師提督員缺著藍元枚調補其陸路提督自

當擢用現在臺灣出力總兵柴大紀於林爽文等滋事不能預為防範到諸羅後又不能進勦斗六門賊匪本不當復邀陞擢但念其防守郡城尚為奮勉出力功罪自不相掩所有陸路提督員缺著加恩令柴大紀暫行署理以觀後效



欽定平定臺灣紀略卷十二

欽定四庫全書

史部

欽定平定臺灣紀畧卷十五

內閣中書_臣沈鵬覆勘

武英殿纂修中書_臣彭元琬

欽定四庫全書

欽定平定臺灣紀畧卷十三

四月初五日

王

李侍堯奏言接兩廣總督臣孫士

毅咨稱前調粵兵四千名第一起於本月十六日

起身計二十三等日可到廈門臣隨於二十自

泉起程往廈門料理辰刻抵南安縣接黃仕簡咨

會知鳳山城又被賊佔刻行至沙縣又接常青

來札備述臺地情形并增調兵七千查前據同知

楊廷理稟臺地現有之兵只有一萬三千餘名而該提鎮等以之分派府城鳳山諸羅鹿仔港淡水五處本屬備多而力分毋怪左支右詘不能奏功轉致失事今鳳山既陷郝壯猷損折之兵不下一千六七百名則兵力益覺單薄看來常青所請增調七千之數實不可少賊既乘鳳山之勢來攻府城據常青奏已在離城十里之外則目下第一以保守府城為要務倘稍有疎虞益難辦理幸總統

大員一到人心稍定兼以所解銀餉據各委員稟報亦俱於初八九等日運至府城可藉以守禦適粵兵將次到廈門係二百五十名為一起臣擬每到兩起即令開駕一次先往助守算來事機尚可相接不致緩不及事至常青請調南澳金門銅山海壇各營兵二千名粵兵三千名浙兵二千名想係尚未接到臣先調粵兵之信今查金門銅山等營調派出征者已多本營存兵無幾處處海疆未便

再撥粵兵既調四千已過常青所請之數亦難再
調惟浙省與閩省毗連從前常青曾札知撫提二
臣預備兵三千今臣一面知會琅玕陳大用令將
原派之三千名星速由陸路來閩以資接濟但郝
壯猷已折耗兵一千六七百名則即增調七千亦
僅多五千餘名而府城鹿仔港兩處俱係極要勢
不得不分撥一經分撥則以之守禦雖有餘以之
進剿又不足應請再增調浙兵一千於剿捕事宜

庶更得濟惟常青所請七千名悉赴府城現今普
吉保會同柴大紀勦捕斗六門之處似覺專顧府
城而委鹿仔港於孤注查鹿仔港距大里杙僅四
十里去冬陳邦光等之易于剋復以林爽文正在
南攻府城是以得乘虛收復匪徒時出肆擾其勢
更重於南路是此時之鹿仔港比舊時之鹿仔港
迥然不同任承恩普吉保等雖不能奮勇勦殺而
鹿仔港至今得以無恙究亦賴此三千八百餘兵之

勢隱為形援若將此內普吉保之一千六百兵分
往諸羅林爽文探知任承恩兵單來肆兇逆任承
恩必不能支將鹿仔港亦不能守鹿仔港不守則
蚶江遂無進兵之口於臺地全局大有關係臣初
接黃仕簡咨會恐府城兵少原擬將粵兵四千盡
改由廈門赴府城今接常青調普吉保往攻斗六
門之摺稿只得仍照原奏以粵兵二千五百赴府
城一千五百赴鹿仔港俟浙兵到日或應兩路各

派一半抑或多寡酌配之處俟探聽鹿仔港光景
再行酌辦再查澎湖協為臺郡咽喉本有兵一千
八百餘名因黃仕簡兩次調取一千名赴臺灣應
用該協兵力殊覺單薄蚶江與鹿仔港相對順風
一二日可以直達亦不可無兵備禦查去冬臺匪
滋事時前督臣常青曾調汀州兵五百名邵武兵
三百名在汀漳交界之永定上杭二縣駐劄以待
調用今已另調兵前赴臺灣而澎湖蚶江二處均

關緊要是以臣將駐劄永定之汀州兵五百名調往澎湖駐劄上杭之邵武兵三百前往蚶江庶要地均屬有備奏入

上命軍機大臣傳諭常青李侍堯琅玕陳大用曰浙省兵丁素性懦弱朕南巡時閱看浙閩兵丁技勇浙兵與閩兵角藝即形畏怯況現在臺灣賊匪皆係閩人之慄悍者閩兵攻勦尚不能勝何況浙省之兵更不如閩省調往協勦豈能得力是以昨據常青奏調已

傳諭琅玕停止今據李侍堯奏為海疆緊要存兵無
多請於浙省派撥所奏亦是此項浙兵止可分撥內
地海口各營協防若以之進剿自不若本省兵丁為
得濟自應遵照所降諭旨
在閩省各營先行抽撥以
資接濟其浙兵到閩時竟留於內地防守亦足以資
彈壓至李侍堯請調浙省兵丁四千名較之常青原
調浙兵數目已多二千名昨又經朕籌及閩省駐防
滿兵自較綠營為優則此一千滿兵抵浙兵二千况

係常青舊屬已諭恒瑞揀選一千名帶往會勦此時李侍堯止須調浙省三千名自屬敷用且浙省兵丁溫衢地方距閩較近該處兵丁在浙省中稍為疆健著琅玕陳大用即於該二鎮所屬各營揀派兵丁三千名速赴閩省交李侍堯酌量派撥至李侍堯奏鹿仔港一路現經常青調去普吉保兵一千六百名分往諸羅恐任承恩兵單力薄不能支持等語所慮亦是但任承恩種種玩悞漫無調度即留該處亦終不能

得力昨已降旨將藍元枚授為叅贊帶領閩兵二千
前赴常青處會勦今思常青既有粵兵四千並駐防
滿兵一千及存城各兵足敷進勦其藍元枚所帶兵
二千名竟著由蚶江配渡前赴鹿仔港藍元枚到彼
接代後將任承恩送回內地即行拿問解京再藍元
枚係領兵大員自應賞戴花翎以示威重伊於江南
提鎮任內如曾經賞過則已若未賞過著常青即傳
旨賞戴俾益加感奮力圖自効再常青奏賊匪攻得

鳳山乘勢來犯府城已到十里之外是其自來送死
雖閩兵甫經失利不足倚恃而常青可以簡其精壯
鼓其勇氣未始不可以逸待勞設法堵截勦殺亦足
破賊人之膽該將軍接奉此旨即將如何殺退賊匪
之處迅速奏聞

初八日己琅玕奏言准常青咨會臺灣賊勢鴟張
所有浙省原備兵二千名仍調撥由鹿耳門進口
並令刻日起程又准督臣李侍堯咨會奏明調撥

浙省原備兵三千名再于距閩附近各營添派兵一千名由陸路分起饋行馳赴廈門配渡查浙省前經酌撥備調兵三千名雖已准咨撤令歸伍而一切戰械火藥鉛彈等項俱已備辦齊全此時即可按名調齊起程至現需添派兵一千名查衢州鎮標距閩甚近自應即于該鎮各營派調以數四千之數當即飛咨提臣陳大用督同各鎮臣迅速調齊派委勇練將弁督押統領立即由陸路分起

僂程前進沿途照例支給兵糧飭令各該道府各
在本境督押照料進行並委藩司顧學潮杭嘉湖
道清泰分往各路沿途督辦查催並咨會閩省督
撫臣飭屬一體接護支應奏入報

聞

初九日 丙午 孫士毅奏言前據常青究出廣東後溪

鳳花亭洪二房和尚及朱姓人犯知會密拿惠潮
等屬並無其地惟風聞嘉應州遂鄉堡地方廟後

有亭其後半被火燒燬內有洪和尚及朱姓等經
姚蔡密委惠州府知府顧聲雷等馳赴確查並無
遂鄉堡地名各堡內亦無曾經被燒廟宇復查靈
峯寺有洪朗洪科二僧與俗家朱姓十七八歲僧
人立嵩同住與閩省來咨恰合委員隨往搜查寺
僧七人並無不法字跡所供住址族屬俱在附近
歷歷可查左右亦無溪亭寺後亦無曾經被燬之
事寺鄰耆老保甲僉供平日並無為匪願具保結

各等情又訪有海陽縣南山寺和尚耀珠俗家姓洪有子秀節現在潮陽黃隴庵為僧並據潮陽縣知縣台霖布將秀節押解到郡確訊實係安靜焚修並無為匪情事此外惟潮陽一縣洪朱二姓頗多大半皆係晒丁其餘悉屬種地農民並無和尚亦無洪二房名目嗣又續獲會匪林功裕供出福建平和縣人林三長勾引入會曾經告以朱洪德姓名臣在省時會同撫臣圖薩布提并先獲之許

阿協等對質又供有洪李桃係屬和尚家住漳浦縣榕樹脚向在龍溪縣東門外福連寺出家又有頭人李九陶是平和縣小溪鄉人等語其於洪朱等犯名姓亦似畧有端倪並知會閩省密為存記臣抵潮後又據饒平海陽等縣稟獲陳阿塔余阿緒二犯所供入會情事與許阿協等大畧相同臣思此等匪犯行踪詭秘斷不肯將不法字跡及往來交結等事輕露於人茲復欽奉

諭旨閩省搜出賊匪書稿現有廣東鳳花亭高溪庵馬
溪廟洪姓結盟之語鳳花亭雖現在查無下落其
高溪庵馬溪廟自必實有其地一經查得即可從
此跟求臣已密懸重賞分派妥員嚴切偵緝凡有
寺廟聲音相似形跡可疑者亦即徹底跟查毋使
倖脫仍知會李侍堯常青此後拿獲匪犯活口即
就近跟究鳳花亭高溪庵馬溪廟三處實係粵東
何縣地方星速咨臣查辦則得有確實州縣查拿

更易為力又查閩省徵調粵兵四千名自三月十六日起至二十二日潮州鎮標兵俱已起程計三月二十三日此一千名全數俱入閩省詔安縣境臣在潮點驗起程即於本日馳赴黃岡照料其餘各營水陸官兵接續前進斷無遲悞再粵省兵丁此番渡臺勦捕水陸共四千名臣每起面加鼓勵察看情形頗知踴躍赴公似應遇有粵省派兵營分千把外委及馬戰兵丁缺出請先儘軍營拔補

以示激勸奏入

上命軍機大臣傳諭孫士毅曰粵省訪出之洪姓和尚等既訊明實非此案匪犯自不必累及無辜但洪姓和尚及朱姓乃倡會結盟要犯前經閩省拿獲偽官楊軒供出嗣搜出賊匪書稿內其所開姓名住址又復與楊軒所供相同是其人自必仍在粵省外省地方官習氣往往迴護前非于緝捕事件一經查無踪跡稟報之後即或續行查出慮及前此查辦疎漏恐

致獲咎不肯據實稟出一以爲有完事最爲可惡著
孫士毅務宜詳悉開導諭以該犯等現雖查無下落如
將來查有鳳花亭等地名仍當據實稟報其從前疎
漏之咎俱可寬免倘從此跟求果能弋獲正犯並可
仰邀陞擢若敢始終迴護別經發覺必當加倍治罪
如此反覆曉諭庶各該員知查出後無過有功必能
認真購緝不至始終迴護轉令要犯得以漏網

十二日

配

常青奏言總兵郝壯猷帶領副將丁朝

雄叅將那穆素里遊擊蔡攀龍都司羅光照等帶領兵丁二千一百名前赴南路進剿在大湖劄營月餘雖間得勝仗究未能前進嗣經黃仕簡添撥遊擊延山鄭嵩各帶兵五百名助戰于二月二十一日抵鳳山縣城賊匪退走僅存空城黃仕簡因安平海口緊要調副將丁朝雄回安平扼守又因賊匪欲來攻臺灣府城調遊擊蔡攀龍帶澎湖兵八百名回郡堵禦郝壯猷尚帶官兵二千餘名足

資堵禦乃三月初四日因叅將瑚圖里自山猪毛被賊攔截郝壯猷派令遊擊鄭嵩帶兵接應行至硫磺溪遇賊圍截官兵喪失甚多賊匪遂蜂擁而至郝壯猷退守縣城初八日賊衆進城官兵潰散該總兵郝壯猷叅將那穆素里都司羅光照等陸續回到郡城潰回兵丁計七百餘名遊擊鄭嵩被鎗傷陣亡是鳳山已經收復之後旋即失守實由黃仕簡調撤失宜總兵郝壯猷不能抵禦以致敗

卹該提督黃仕簡已摘去花翎解任總兵郝壯猷
臣亦即飭令摘印并去花翎頂帶相應請

旨將黃仕簡郝壯猷交部治罪其餘將那穆素里都司
羅光煦守備黃喬一併革職暫留軍前効力贖罪
再臺灣逆匪滋擾上年十二月內疊次迫攻府城
經總兵柴大紀督同臺灣道同知等率帶義民鄉
勇奮力堵殺保固郡城迨柴大紀克復諸羅之後
據報屢次剿殺賊匪生擒賊目實屬奮勉出力臣

已傳

旨加恩賞戴花翎將水師提督印務交與暫署任承恩
陸路提督印信暫交普吉保護理再臺灣本地戍
守兵丁共一萬二千餘名經三縣被陷傷亡已多
其內地調來臺灣勦匪兵丁共一萬餘名除分撥
三路進兵亦有傷亡逃散府城駐防班兵甚少業
已飛咨李侍堯續調本省內地及廣東浙江共兵
七千名配船渡海俟兵到三四千之後臣即親自統

領由南而北務將賊匪首夥盡數擒獲其各路擒獲賊匪將要犯飭令解赴內地李侍堯審辦其餘賊黨臣即就地審明辦理奏入

上命軍機大臣傳諭常青李侍堯曰郝壯猷身為總兵大員于賊匪復犯鳳山時既不能先事防禦又不能督率弁兵奮勇殺賊潛回郡城似此恇怯倖生若不明正典刑何以肅戎行而昭軍紀此豈徒交部治罪可以完事者早經降旨令常青將伊正法以示懲儆

諒常青發摺時尚未接到耳至臺灣現有兵丁經屢次挫損不免氣餒常青不可不大加振作如兵丁臨陣時有一二畏縮退避者即立時正法懲一儆百即將備內有恒怯不前者亦即一面正法一面奏聞而才能出衆奮勇殺賊之兵弁即奏請破格超擢今賞去翎子以備鼓勵戎行之用俾知死生呼吸之際退則必死進則可以殺賊立功邀恩拔擢即不幸陣亡國家自有優卹如此賞罰嚴明自必人人知所感奮

可期鼓勇集事常青雖未經行陣而行軍之道信賞必罰朕屢加訓諭該將軍尤宜遵照妥辦也至總兵柴大紀普吉保功罪原不相掩前已有旨令柴大紀署理陸路提督普吉保仍留軍營俱令帶罪督兵以觀後效果能奮勇出力不但宥其前罪並當旌錄其功現在曾經行陣之侍衛章京內派出八員即日啓程令其晝夜星馳前往但臺灣距京較遠到彼究湏時日著傳諭常青不必待伊等到彼始行進剿以致

稽遲俟所調粵兵四千名及駐防滿兵一千名到齊
酌量可用時即行帶領直搗賊巢生擒首逆務湏奮
勇持重計出萬全以期迅速嚴事藍元枚前已降旨
調補水師提督授為叅贊令其速赴鹿仔港會勦該
提督目擊黃仕簡任承恩之觀望遷延身罹重譴自
當益加奮勉再前據常青奏賊匪攻得鳳山乘勢來
犯府城已到十里之外等語此次摺內何以未將如
何勦殺之處奏及朕心甚為懸切著該將軍即將如

何籌畫擒殺賊匪情形迅速奏聞

臣等謹按行軍紀律嚴明有功必錄有罪必誅則
人人無倖生之心方克集事郝壯猷於賊匪來犯
鳳山時不能督率弁兵竭力抵禦乃竟退回郡城
希冀倖免我

皇上立命於軍前正法並將其棄城潛回是以按軍法
從事緣由明白飭諭俾三軍共知畏怯倖生必至
身罹重辟羣相警戒並

命於弁員內如有才能出衆奮勇殺賊者即行奏請破格超擢鼓勵戎行之道真無所不至宜將士等人用命踴躍爭先所向無敵也歟

同日李侍堯奏言臺灣保聚尚完者惟府城及鹿仔港等四五處而府城為全郡根本鹿仔港亦進兵要口且近大里杙此兩處必須保固方可措手現在粵兵到廈已有四起臣令隨到隨即登舟一候順風即行開駕但得先到數百人心即定并

知有大兵繼至更當轉怯為壯其鹿仔港一路臣
現擬將粵兵內先撥一千五百名前往俟浙兵到
日再派往二千名兵力既厚并可無俟常青南路
之兵來會即直搗賊巢庶南北兩路俱有重兵剿
殺賊勢自當潰散昨以粵兵每起二百五十名尚
覺遲緩復札商孫士毅併為五百名一起計四月
初十日前粵兵二千五百俱可到齊其一千五百
名之赴蚶江者亦相繼入閩適署提臣藍元枚查

察海口來至廈門因留伊在廈照料催趲臣於數
日內即至蚶江料理兩路均可不致遲悞再此次
粵省官兵緣督臣孫士毅預行選派皆年力強壯
看來甚可得力又於各兵內攜帶火藥三萬觔之
外另備五萬觔解閩接濟查閩省雖不缺乏然火
藥要器多為預備益覺寬裕將來用過若干仍可
按數歸還再粵省第二起官兵自海澄縣水路赴
廈兵丁曾得高等一船到嶼仔尾地方有盜二十

餘人駕船來劫兵丁受傷者六人失去鳥鎗腰刀等物查廈門係水師提督駐劄之地嶼仔尾離廈不過十餘里又臣方在廈門而盜賊已肆行無忌若此可見戎政廢弛遂使瀕海之地竟為盜數此等匪徒縱未必係臺匪黨羽而縱橫洋面久為商民之害并有盜劫兵船之事更屬目無法紀似此怠玩之文武若不嚴叅示儆無以肅吏治而飭營伍請將海澄縣知縣侯謹度水師提標中軍守備李

光輝革職留於地方協緝勒限一年如限滿不獲再行交部治罪其石瑪通判安靜水師叅將王祖烈均有督率之責咎亦難辭請將該二員交部嚴加議處至總兵羅英笈於所轄地方全無整飭應一併交部嚴加議處又現在押解臺灣逆匪林小文等四犯林小文蔡綱係糾衆為逆之犯廖攀龍係海口山汛把總曾將火藥四五十觔送與賊目何朝英係已革外委曾在扈尾與官兵打仗奏入

上諭內閣曰沿海地方盜賊出沒最為商民之害甚至
駕船行劫渡海官兵不法已極該管地方文武員弁
並不能立時緝獲非尋常疎縱可比侯謹度李光輝
俱著即革去頂帶暫行留任勒限半年在該處緝捕
總兵羅英爰亦著即革去翎頂暫行留任在該處督
緝其通判安靜叅將王祖烈均著革去頂帶暫行留
任督緝務於半年內將盜犯按名緝獲速正刑誅
如限滿不獲即著該督據實叅奏分別從重治罪

上又命軍機大臣傳諭常青李侍堯曰李侍堯奏洋面盜案摺內稱此等匪徒未必係臺匪黨羽所見實未周到該犯等膽敢在洋面駕船肆行劫掠甚至執持鳥鎗藤牌等械傷害商旅已屬不法且現在粵省調赴疊灣勦捕賊匪之兵衆所共知該犯等輒於嶼仔尾地方駕船行劫與兵丁互相格鬥安知非林爽文等探知消息令其黨羽在中途劫掠以挫銳氣而緩行程何得僅以尋常海洋盜犯辦理李侍堯自因現

在籌辦一切事緒繁多心曲紛亂未能見及於此至
閩省地方文武員弁於緝捕盜犯全不認真使瀕海
之地竟成盜藪廢弛已極本即應從重治罪姑念該
省現值多事未便遽易生手且該文武員弁若此時
即行革職轉可遽離本任置身事外是以降旨將該
員等俱革去頂帶暫行留任在該處勒限緝捕但該
縣侯謹度守備李光輝于所屬地方一任盜匪縱橫
洋面行劫兵船已屬罪無可逭著李侍堯詳悉諭知

該員等現止革去頂帶留任緝捕實屬格外從寬務
須實力查拿以圖自贖若限內不能將各犯按名拿
獲則是該員等始終怠玩即應在該處正法不能再
邀寬宥總兵羅英笈於所轄地方毫無整飭今暫加
恩革去翎頂留任緝捕若再不能于限內督率弁兵
將盜犯全行緝獲並著李侍堯於限滿時據實嚴叅亦
應實以重典決不寬貸著李侍堯將此嚴切曉諭俾
該員等各知儆畏迅速上緊緝拿毋致自罹重辟蓋

該省正當軍旅之際不可不從嚴辦理也至此等盜犯黨賊逞兇罪在不赦一經拿獲著李侍堯即行審明按名正法一面辦理一面奏聞不必照海洋尋常盜犯之例分別辦理

臣等謹按緝盜安民守土之職閩省當臺匪滋擾之時海洋盜匪縱橫且敢行劫兵船不法已極而怠玩之地方官實罪無可逭

皇上於督臣所擬勒緝一年之期改為半年不獲即立

置重典俾人知儆畏庶能實力緝捕奸宄不致漏網因時立法猛以濟寬而猶傳

旨諄諄訓飭所以大震啓其聾聵而禍福仍聽其人之自取者歟

欽定平定臺灣紀畧卷十三

欽定四庫全書

欽定平定臺灣紀畧卷十四

四月十三日

庚戌

上命軍機大臣傳諭富勒渾雅德曰沿海盜賊最為商民之害今閩省蚶江一帶劫案甚多並未將首夥即時拏獲而嶼仔尾地方僅距廈門十餘里盜賊竟敢行劫兵船可見該省政務廢弛已非一日地方官怠玩諱飾遇有劫案僅以尋常械鬪將就完結以致釀

成巨案且臺灣遠隔重洋最關緊要道府廳縣必須
才守兼優之員方能勝任朕久聞該省督撫遇有臺
灣缺出不問屬員才具是否相宜多以私人調補而
得缺之員從不以冒險渡海為慮反視為利藪又安
望其整頓地方實心辦事此等劣員若到臺灣無所
津益何視為美缺而其津益非取之商民何從而得
則致民怨滋事劫縣戕官實有由來矣從前歷任督
撫已多身故難以追究至雅德由該省巡撫擢用總

督在閩最久非若富勒渾之尚藉口在浙江辦理海塘者可比今貽誤地方至于此極着令其自思罪狀激發天良自揣如何贖此重戾一並明白回奏若稍有不實不盡無難將伊拏回照黃士簡任承恩一律治罪雅德不能似彼二人之尚可寬一線也至富綱在閩撫任內雖未及雅德之久在任亦有二年而于地方事務緝盜安民全未整頓實難辭咎其如何贖罪之處一並據實明白回奏

上又命軍機大臣傳諭常青李侍堯曰兵丁奉派出征不能奮勇効命乃遇敵即行潰散綠營恒怯惡習最為可恨此而不嚴加懲治其何以昭軍紀而肅戎行從前金川潰逃兵丁一經拏獲即行正法此次逃亡之兵亦應按照此例從嚴辦理但此時軍務未竣未便遽行查辦致滋疑畏著常青李侍堯俟事定後嚴查實在逃逸者即照金川逃兵之例辦理以儆將來其逃回軍營仍復打仗對敵者不在此例又常青昨

奏摺內稱遊擊鄭嵩被鎗傷陣亡該遊擊如果臨陣
捐軀自應議卹但據何人所報於何處禦賊陣亡摺
內亦未聲叙明晰著常青再行詳查明確據實覆奏
常青前次奏摺係三月十三日拜發而此次奏摺則
係二十一日拜發相隔已有八日此數日內賊匪曾
否攻犯郡城官兵作何堵禦截殺斷無坐視之理著
即將如何籌畫調度情形由驛迅速奏聞

十四日

辛亥

上命軍機大臣傳諭李侍堯閱鶚元李世傑琅玕曰此次臺灣勦捕賊匪未經簡派御前乾清門侍衛前往者因常青素非內廷行走大臣恐呼應不靈轉不能得力是以於侍衛章京內檢選派往常青現已授為將軍即如領侍衛內大臣加意管轄方妥若該員等打仗出力著有勞績即據實保奏倘有不遵約束率意妄行者即嚴行叅辦不可稍存瞻顧該員等起程時已令軍機大臣面行訓諭俟伊等到彼並著常青

將此旨曉諭傳知俾各敬凜至此等侍衛章京皆係
武職恐見小貪利沿途或有需索亦未可定不可任
其所求過於優待常青李侍堯琅玕均係滿洲大臣
又皆閩浙督撫常青李侍堯或每人資助百金琅玕
或每人資助五十金尚無不可然不可來往皆與之
其餘嗣曾及藩臬以下並沿途督撫則均可毋庸餽
送伊等果能勦賊立功朕自優加恩賚設該員等不
知自愛沿途經過稍有額外需索該督等一經查出

即行據實叅奏朕必將該員等加倍治罪以示懲創

十七日

甲寅

上命軍機大臣傳諭李侍堯徐嗣曾琅玕曰向來閩省內地民食全賴臺灣稻田豐熟得以源源接濟現在賊匪林爽文等糾衆滋事農民未能及時栽種朕心深為軫念通省民食關係緊要必須預為籌畫俾糧食充裕市價不致翔踊方為妥善浙省溫處一帶與閩省毗連從前該省商販往往由海道運至閩省接

濟現距秋收之期尚遠或彼時閩省竟無須隣省接濟固屬甚善倘民食稍有未敷尤應設法早為調劑俾得有備無患李侍堯統轄閩浙兩省著會同徐嗣曾悉心酌議預行知照浙省屆期如有必須接濟之處即委員採買務令裒多益寡民食無虞缺乏至閩省因有臺灣之事內地糧價自不免稍昂倘有奸商乘機囤積居奇射利最為可惡著該督等飭屬密訪嚴查一經拏獲即應從重懲辦一二以儆其餘不可

稍存姑息

臣等謹按閩省糧食向賴臺灣接濟自林爽文滋擾各莊本處不能耕種運赴內地者必少閩省市價自漸致昂貴我

皇上於撫臣奏報春收之時早慮及秋收期遠不待奏請先

諭令於浙省通融採買酌盈劑虛俾得有備無患益仰見

念切民依周詳肫摯且無時或釋也

十八日

乙卯

孫士毅奏言高廉鎮總兵梁朝桂現已

星飛檄調俟到潮即飭令趕赴閩省帶兵會剿至

總兵陸廷柱於三月二十八日帶兵到閩計此時

將配船渡臺查粵省水陸兵丁四千名現在入閩

境者已經過半計四月初十日前全數俱入閩省

又火藥為行軍利器此時臺逆既未蕩平火藥亦

應添備

臣

於粵兵隨身攜帶三萬斤外復另備五

萬斤運送閩省以資接濟奏入報

聞

二十日

丁巳

李侍堯奏言臺灣遠隔重洋運送兵丁

糧餉等項俱係雇覓民船應用查部頒軍需則例但有內河運脚而海運並無明文上年黃仕簡任承恩等帶兵前往臺灣倉猝僱用但以所載兵數約畧給值各船大小不同自渡送官兵之後凡差員前往及解銀運糧等項僱價已不能畫一今勦

匪尚未竣事需船正多若不酌定章程則目下辦理既不免參差將來並難於造報查部頒水運條例內開運糧水脚順水每石每站三分六厘逆水每石每站七分等語海運本無順水逆水之分但以風之順逆為進止凡遇開駕必趁順風應即以順風抵內河順水之價自廈門至鹿耳門十二站蚶江至鹿仔港九站閩安口至北淡水八站概以每石每站三分六釐給價其未聞洋以前之守候

及運到之後回空俱不另支口糧如此酌定僱價較之內河逆水僱價可節省一半有餘而各船戶亦不致有苦累其內地各州縣碾米運至泉廈兩倉者除內河照部例支銷外自內河出口後亦有應由海運之處並照此計程核給至送兵解銀及官員奉差往來難以石數記者則就船之大小可載若干石之數照此記算以歸畫一又數日內連接常青來劄稱鳳山再失之後賊匪益肆滋擾臺

灣府城亟須添兵因奏調之兵尚需時日先調澎湖兵四百及水師提標兵六百前來助守又據臺灣道永福知府楊廷樺稟稱府城內外僅存兵三千餘名現在添僱鄉勇萬餘人以資守禦三月二十二三等日賊漸逼府城督臣常青親帶官兵鄉勇躬自臨陣多有斬獲又據臺防同知楊廷理稟稱北路賊連日焚劫各莊涵西港為米糧通郡之路被賊梗塞府城米價益昂南路賊又沿村迫脅

日積日多督臣雖堵剿二次而賊匪遍地滋擾彌覺增多是臺灣府城目下需兵甚急而粵兵自前月二十二日起陸續至廈門臣令隨到隨即登舟總兵陸廷柱亦於本月初二日到廈緣連日東南風大難以放洋茲於初六日得有順風陸廷柱即帶已到之粵兵一千七百餘名楊帆飛渡計兩三日可直抵臺灣查常青札稱目下但得千餘兵到即可鎮定人心今一千七八百兵連踪而至且知

隨後尚有粵兵浙兵續到合郡士庶不惟頓解驚惶並當勇氣百倍至鹿港一路據都司陳邦光稟稱林爽文現踞大里杙烏日莊等處又有陳泮吳領踞虎仔坑南北投等處欲進攻林爽文則陳泮等無人可禦欲進攻陳泮等又慮林爽文乘間而來是鹿仔港亦需兵甚急現在常青已奏將任承恩解任普吉保護理正當新舊更替之際人心尤易驚疑臣前所調粵兵原奏明以一千五百名赴

鹿港今亦將次入閩是以臣由廈回至泉州向蚶江料理配渡昨奉

旨以粵兵四千陸廷柱一人難于統率令梁朝桂前來分領陸廷柱已在廈門先渡則梁朝桂應至蚶江領兵前往但該鎮自高州起程恐路遠不能即至如粵兵全數已至蚶江而該鎮尚未趕到未便令各兵守候應即令帶兵之副叅等先行東渡俟該鎮到時再行續往又先據署臺灣府知府楊紹裘

等詳稱運送兵糧等項夫役繁多府庫無項動撥
懇于藩庫撥銀十萬兩支應事竣造銷又據臺灣
道永福知府楊廷樺稱鳳山諸羅彰化淡水四廳
縣倉庫悉空府城倉穀無多懇解米十萬石分路
接濟彰化縣屬僅存鹿仔港一處尚在固守各村
莊男女老幼咸來避匿不下十萬餘人無處得食
似應做照災賑之例量為賑卹至鄉勇口糧向係
義民公捐今為日已久義民告匱難令再捐鄉勇

無食必然解散擬照出征兵丁每名日給米八合
三勺鹽菜錢十文另加給三十文挑選壯丁以備
攻勦事竣報銷其加給錢文就臺灣文武官員勻
捐補款各等因臣查軍糈緊要固不可稍有遲誤
而一應動支尤須核實自上年十二月起陸續解
往銀已二十萬餘兩米一萬九千餘石又委員賫
銀三萬兩前往買米計可得一萬數千石近又准
常青咨取銀十萬兩並淡水同知徐夢麟帶往銀

一萬兩以上銀米二項以現兵及續調之粵浙兵
計算約可供十個月餉銀五個月口糧乃該道府
等于官兵糧餉之外又添出鄉勇難民二項查鄉
勇本義民所僱固屬急公向義實亦自衛身家義
民力雖稍乏亦應勸諭鼓勵使勉終事俟大兵
一到即可息肩若照該道府所稟每名每日支給
錢米且較官兵所支更多現在府城鄉勇已不下
萬人他處亦動須鄉勇若非數萬石米數十萬兩

銀不敷支應至避難男婦亦祇應於勦匪事竣後
量為安插撫卹此時軍務為急固無項可支兼亦
無官員為之料理是以臣諭令司道等將常青咨
取銀十萬兩如數解往而該道府等之另請銀十
萬兩米十萬石概行議駁如有例外必需之處仍
飭該道府稟請督臣常青就近核示庶帑項不致
濫支而軍務亦不致貽誤又臣前以澎湖戍兵一
千八百餘名經黃士簡兩次調派一千名赴臺灣

應用澎湖甚覺兵少曾奏明將駐劄永定縣候調之汀州兵五百名調往澎湖駐守各兵已經起程尚在途次今常青又調澎湖兵四百前往臺灣則澎湖僅存四百餘名益覺單薄適汀州兵亦於初六日晚間到厦隨飭厦防廳照例發給糧餉催令開駕

同日琅玕奏言接李侍堯咨調撥浙省原備兵三千名再於距閩附近各營添派兵一千名由陸路

赴閩聽候調遣當經臣飛行提臣及各鎮臣將原備兵三千名迅速調齊由陸路分起僱程前進並於附近衢州鎮標添派兵一千名派員統領赴期先行起程茲欽奉

諭旨浙省止須調兵三千名令臣等于溫衢二鎮所屬各營檢派速為料理查浙省原調兵三千名係溫州黃巖鎮各一千名提標及鎮海營一千名其添派之衢州鎮兵一千名離閩省最近現已據報于

初九日全數出境而溫州黃巖鎮兵俱跟接行走
亦可尅日前抵閩境若再為撤回另派恐有稽時
日是以即咨會提臣飛行統兵之溫州鎮臣魏大
斌迅速趨行所有提標及鎮海營兵一千名係由
寧波起程離閩省較遠計算尚未出境已知會提
臣行令撤回歸伍至護送各兵臣委藩司顧學潮
杭嘉湖道清泰分往各路沿途督辦均可不致遲
誤

同日陳大用奏言溫衢二鎮原派兵二千名均陸續出境黃嚴鎮兵一千名亦距閩較近現在飛咨領兵鎮將立即趲行前進其提標並鎮海營兵一千名係在飭派三千之外俟奉到

硃批應行應止飛飭遵辦再總兵魏大斌副將詹殿擢臣因伊等曾任臺灣是以分派統領應否留閩差

遣之處咨會督臣李侍堯聽其酌量辦理均奏入上命軍機大臣傳諭常青李侍堯琅玕陳大用曰現在

賊匪勢尚猖獗竟敢攻犯府城常青親率官兵鄉勇
臨陣多有斬獲此時粵東兵丁陸續到彼常青得此
自可鼓其精銳迅速進攻李侍堯在廈門一帶籌辦
照料當以催兵速渡接運軍儲糧餉濟用為要餘可
徐論乃李侍堯摺內鰓鰓慮及多用錢糧恐事竣後
難于報銷止將常青咨取銀十萬兩解往而該道府
等之另請銀十萬兩米十萬石概行議駁仍飭將用
過款項一一報查所見甚屬錯謬所有該道府請發

銀十萬兩米十萬石即著李侍堯速行照數運往以備接濟并著常青就近先行酌量如有多餘兵糈或米或穀散給貧民務使不致逃散方為妥協不然非去而從賊即窮極攘奪皆足債事况鄉勇義民既為國家禦賊兼可衛其資產是以為我出力今致日久賠墊既有陣傷亡故又不能保其所有亦必逃散從賊兵丁弁備尚難望其枵腹從事而况此衆民乎封疆大吏遇此要務惟應以速行勦賊不誤軍行為念

何必慮及賠累此輩無知百姓轉令其竭資自効始
終忠義自守斷不能也李侍堯平日心思尚為周到
不應不識大體若此前據常青奏稱賊匪將所掠錢
米廣為散給要結人心以致日積日衆豈閱時未久
該督遽致忘懷耶蓋慮將來難以開銷恐致賠累私
見固結于中是以為此拘迂之奏該督受恩深重不
應存此私心見小幾乎貽誤大事著傳旨嚴行申飭
前已降旨酌撥粵東鹽課關稅銀三四十萬兩解赴

閩省備用李侍堯若恐不敷不妨于廣東浙江二處不拘何項一面飛咨撥解一面隨報具奏不可稍存惜費之見致有貽誤總宜寬裕籌備接濟軍需最為緊要即有冒濫亦不必預行駁飭轉使承辦之員有所藉口總俟事竣後另行核實查辦即使報銷時格于部例有不應准銷者朕亦不肯令李侍堯事後接任之員稍有遺累當于貽誤軍機之黃仕簡任承恩及道府各員名下分別酌賠朕臨時自有斟酌或酌

量加恩均未可定此總係事竣後辦理之事非此時之急務該督何所用其瞻顧而為驅民資賊之舉耶然此事更宜慎密不可稍有洩漏致滋隱寄至賊匪于三月二十三等日攻犯郡城何以未據該將軍奏報朕盼望捷音甚為懸切再前經降旨因浙省兵力脆弱停調兵一千名又添調閩省駐防兵一千名以足原調四千名之數今兵丁如已撤回即令各歸營伍倘已行入閩境即令其前赴廈門交與李侍堯

酌量調撥多多益善即留于內地巡防亦無不可惟在該督等相度事機辦理總期不誤公事為要

臣等謹按臺灣自林爽文滋事難民不得耕作糧米自必短少乃督臣于道府請給糧米之稟預為奏銷賠累之慮概行議駁竟不慮及難民無以為生必將去而從賊所關甚大

皇上嚴行申飭立命照數發往復委曲曉諭以明其非而該督臣旋亦訪聞切實速籌調劑所以該處難

民不致流離失所而鄉勇義民亦始終感奮不倦也

二十三日

庚申

孫士毅奏言挑備粵兵四千名分起

赴閩嗣復經李侍堯札催其隨後續到之兵

臣即令

并起前進所有粵兵四千名現於四月初十日全

數俱入閩境昨據總兵陸廷柱自廈門申報三月

二十二日起至四月初二日止粵兵到廈已有一

千八百名其配渡船隻先經李侍堯親赴廈門備辦

齊全先後配船出港若遇順風四月初十日前即可到臺此外尚有七百名亦可接續到厦配船東渡其派赴蚶江一路由鹿仔港進剿共兵一千五百名并作三起亦于本月初十全數抵閩臣在黃岡點送各弁兵俱剴切曉諭察視將弁兵丁頗皆踴躍奮興再臣聞賊匪每逢大雨前來劫掠我兵平日習慣驕惰不耐雨淋往往喫虧又聞有蔡遊擊帶兵打仗頗為賊匪所畏臣得之風聞謹據實

陳明再接據潮州鎮標都司王雄稟稱三月二十
二日有粵東赴閩第二起征兵由海澄下船赴厦
夜間有兵丁曾得高等八名共坐一船忽遇賊船
二隻約有二十餘人乘夜搶奪該兵丁內六人受
傷失去鳥鎗等物查該兵等派令赴閩勦除臺逆
無論白日昏夜均應整肅軍容使人望而難犯今
遇內地賊匪一二十人雖事起倉猝隨身俱有器
械儘可奮力格殺若擒拏一二匪犯交閩省追出

夥黨即可從此徹底究辦乃並不傷獲一犯反將鎗刀失去數件且被打落水竟成狼狽情形臣飛檄統領鎮將查明該兵八名係何弁員帶領嚴飭此次到臺果能奮勇殺賊尚可將功折罪仍惟怯無能立即斥革從重懲治俾軍營弁兵共知儆惕奏入報

開

二十四日

辛酉

李侍堯奏言前接常青調普吉保帶

兵往攻斗六門之信恐任承恩兵力不支鹿仔港
或有疎失是以擬分粵兵一千五百名前往協助
今任承恩已經常青叅革普吉保自必仍在鹿仔
港不復分兵則鹿仔港可以放心今將此兵全赴
府城以裕攻勦之用甫入閩境臣即檄粵省領兵
各官一直赴廈門配渡仍檄不必俟全數到齊但
遇順風即行開駕梁朝桂如不能趕到則令其隨
後續往至鹿仔港一路現在究亦緊要普吉保見

任承恩以遷延獲咎自必思刻期進剿但恐兵力尚不敷用所調浙兵四千本月二十內外陸續可到泉州擬將先到之二千亟赴鹿仔港後到之二千仍赴府城惟目下鹿仔港與府城南北相隔常青雖係總統而呼應尚不甚便捷恐浙兵到彼無所稟承臣一面嚴飭普吉保俟浙兵到時務當視同一體均勞共苦勿得稍存岐視速即親自督率閩浙兩省弁兵直攻大里杙等處使北路之賊不

能赴援南路之賊則常青在南益易勦除可迅速
向北夾攻矣再現在增調官兵糧餉尤當多備閩
省各營兵糧向係臺灣各縣解運穀石供支今臺
地無穀可解又須內地倉穀動支且漳泉民食向
恃臺米販來接濟今臺米稀少內地糧價漸增將
來恐不免平糶則倉儲不敷應用查前歲浙省歉
收奏撥閩省米石運往平糶今閩省需用亦可攸
此通融前已札商撫臣琅玕據稱可撥十餘萬石

由乍浦海運較省腳價臣思與其臨時辦撥或致遲悞不如預籌儲備以資接濟即米已到閩而軍事已竣仍可留作營兵口糧及地方平糶之用將米價歸還浙省均屬有益謹一面具奏一面知會浙撫臣委員陸續由乍浦海運前來奏入

上命軍機大臣傳諭李侍堯琅玕曰向來閩省內地民食全賴臺灣稻田豐熟商販流通得以源源接濟今賊匪林爽文等糾眾滋事臺灣米石內渡者必

少內地糧價自較增昂朕正為此縈念早經降旨令該督預為籌畫並諭琅玕一體籌備想該督等此時尚未接奉前旨茲據奏札商琅玕覆稱可撥十餘萬石由乍浦海運至閩較省腳價所辦與朕前旨恰合著琅玕即速派員如數陸續運往俾兵糧民食充裕儲備方為妥善

欽定平定臺灣紀畧卷十四

欽定四庫全書

欽定平定臺灣紀略卷十五

四月二十七日

甲子

常青奏言近因鳳山復陷約潰

散兵二千名遺失鳥鎗一千有零砲五十門賊益

肆無忌憚時有來犯府城之信臣查府城西臨海

口出入自可嚴防其小南門外之桶盤棧大東門

外之草店尾大北門外之柴頭港俱屬衝要派有

遊擊蔡攀龍孫全謀黃象新等各帶兵七八百名

分劄營盤相機堵剿三月二十二二十三等日有賊三四千人分路來攻各門營盤臣親率官兵出城堵殺將弁用命義民爭先鎗砲打死賊三四百人生擒魏彩王正二名即在軍前斬梟并奪獲旗鎗刀牌三十餘件至二十六日賊衆五六千人直撲府城東南二門叅將特克什布遊擊蔡攀龍孫全謀等督兵勇戰自辰至未鎗砲打死五六百人割獻首級髮辮奪獲九節砲一位是日晚據臺灣道

永福知府楊廷樺同稟有賊目莊錫舍係泉州人密遣親丁莊登來郡悔罪投誠訊據莊登供稱莊錫舍委係莊大田迫脅欲將全家殺害無奈曲從二十七日逆首莊大田等帶賊匪萬餘人四面來攻府城其中能打仗者不過一半現派莊錫舍攻大南門莊錫舍早已堅意投順故叫我先來投信現在莊錫舍帶有二千餘人俱愿投降明日臨陣不敢與官兵抗拒莊錫舍親入投誠等語臣初到臺

灣即聞南路賊目有莊大田莊錫舍等姓名今據道府等所訊莊登供詞恐忽來投首誑騙入城以作內應之詭計諭令莊錫舍殺賊自効方准投降二十七日辰刻賊果圍攻各門營盤併小東門約有八九千人叅將特克什布遊擊蔡攀龍同知楊理等出力截殺時莊錫舍在大南門一路盡令衆人棄械安頓城外單身入城來降該道府諭以大義莊錫舍捫頭涕零情詞懇切臣觀其降出至誠

諭令如果實心投首即應帶手下人一同殺賊方
見誠心投順是日莊大田攻小南門桶盤棧營盤
莊錫舍隨同蔡攀龍特克什布楊廷理隊伍果能
奮力勇往殺賊衆數十人賊見莊錫舍反戈橫擊
即時開亂官兵乘機施放鎗砲直至申刻賊衆敗
逃莊錫舍隨即稟明帶領手下人等飛往竹滬等
處截殺莊大田等併招集泉州義民見功即行飛
報是日鎗砲約計打死賊匪六七百人割獻首級

三十一顆耳記二十五個髮辮四十二個奪獲鎗
刀牌箭一百餘件二十八二十九四月初一等日
各門營盤尚有賊來攻犯俱被官兵義勇協力剿
殺又經鎗砲打死賊二三百人生擒賊夥謝讓陳
榮陳爾三名亦即在軍前正法賊衆盡皆敗逃查
連日打仗其有功之官弁兵民立即獎賞記功惟
遊擊孫全謀微受砲傷已經醫治平復遊擊卬維
揚中砲子陣亡又陣亡把總余壽王澤高二員陣

亡兵丁一百餘名受傷者一百餘名以及傷亡義
勇人等均俟查明賞恤照例辦理再臣前因臺灣
急需添兵策應恐內地各營之兵未能速到是以
就近檄調澎湖兵四百名廈門水師兵六百名茲
接督臣李侍堯札稱已調廣東省兵四千名由廈門
配船飛渡俟一到臺灣仍令澎湖廈門兵各回本
汛奏入

上命軍機大臣傳諭常青李侍堯曰賊目莊錫舍悔罪

投誠帶領所屬二千餘人隨同官兵殺退賊匪並飛
往竹滄等處截殺莊大田等招集泉州義民立功贖
罪自係真心投順著常青即賞守備職銜其屬下人
等有奮勇出力者並酌量分別給予千把總外委職
銜以示鼓勵而廣招徠匪徒甘心從逆原不過希圖
偽職今見伊夥黨投順者即有頂帶之榮自必聞風
嚮慕悔罪輸誠即籍隸漳州者亦未必始終附賊似
亦臨事行權解散賊黨之一法並著常青明白曉諭

莊錫舍等果能奮勉出力將賊首林爽文及有名賊
目擒獻必大加恩擢優賞較大職銜如此愷切諭知
伊等自必鼓舞踴躍或能擒獻首惡亦未可定再前
據李侍堯奏續調粵兵四千名全由廈門配渡齊赴
府城此時自己陸續到齊昨據恒瑞奏駐防滿兵均
已分起配渡起程想必指日可到常青即可親自率
領將南路賊匪掃除即統率大兵往北路會剿直搗
賊窠務將賊首林爽文生擒解京審辦餘黨殲除淨

盡至鳳山復陷後遺失烏鎗砲位甚多皆由郝壯猷失機債事前已有旨將伊於臺灣正法諒常青此時自己接到遵旨辦理矣至柴大紀駐劄諸羅屢有勝仗戰守得宜前已有旨令伊署理陸路提督如果始終奮勉俟剿賊事竣常青查明據實奏到朕必加恩擢用其餘有功出力人員均著常青查明註冊俟事定後分別獎擢再常青自三月二十一日發摺後直至四月初三日始將堵殺賊匪情形具奏固因籌畫

調度督兵臨陣刻無寧晷但朕盼望信息宵旰焦勞
無時或釋嗣後常青當仰體朕懷於督兵攻剿時務
將該處情形於十日之期隨時奏報

同日常青又奏言澎湖水師右營遊擊蔡攀龍於
上年冬間帶領澎湖兵丁渡海應援適賊匪圍攻
郡城該員督率弁兵奮勇截殺保護無虞歷經打
仗無不身先士卒且能審度機宜弁兵用命義民
悅服是以屢次均獲勝仗殲賊甚多洵屬功績最

著之員以之陞補北路協副將實於地方營伍有益仰懇逾格擢用以示獎勵再臺灣各路拿獲賊匪應行解京之犯業飭道府等派委員弁押解內地聽督臣李侍堯審明起解其餘各犯經臣在臺灣府城並柴大紀在諸羅縣訊非賊首賊目亦無投有偽職等情事俱於各該處正法梟示又據義民等揭繳偽示二張恭呈

御覽再臺灣府城義民鄉勇自上年十二月以來原經

臺灣道永福募催三千名近經知府楊廷樺新募
千餘名又有城內泉州五大街居民自願挑選壯
丁千餘名裹糧協助以上新舊義民約五六千名
隨同官兵晝夜防範賊來迎戰實屬可嘉連日殺
賊見功者頗多亦有臨陣傷亡者均即分別記功
賞卹並先註冊俟事竣查辦又查臺防同知楊廷
理協同保護郡城並親帶義民勇往剿捕實屬得
力人員亦先予記功註冊現在南路賊匪經此番

截殺勢漸消退北路諸羅縣城有柴大紀駐劄屢有勝仗戰守得宜彰化淡水一帶臣已密札總兵普吉保副將格綢額等留心堵剿惟因兵力稍單是以尚未得有與柴大紀夾攻捷報臣一俟添調官兵到日掃平南路俾肘腋無患即統率大兵前往諸羅等處各賊窠合兵會剿奏入

上命軍機大臣傳諭常青李侍堯曰莊錫舍悔罪投誠常青恐其挾詐誣誦入城或有內應情事先令殺賊

自効方准投降所辦持重甚合機宜已降旨賞給莊錫舍守備職銜其餘賊目酌量賞給千把總外委職銜令其隨營効用並著常青曉諭賊衆如能誠心投順擒獻賊匪頭目者即照莊錫舍之例分別擢用倘更能擒獻首逆林爽文自必另加優擢顯職投出賊人亦須先令打仗殺賊驗其誠詐方可受降如此辦理始足以堅投誠向化之心而賊黨益可離散但細思臺灣民情慄悍反側不常此時進剿之際兵不厭

詐固宜示以優異設法招徠將來事定後如莊錫舍等究不可留於該處又致故智復萌別滋事端著常青李侍堯俟辦理善後事宜酌量將莊錫舍等投誠賞職之人酌調內地別省各營備弁其所帶降人亦令陸續渡回內地分別他省安插為是但此時且勿稍露端倪致賊黨聞之轉足堅其負固死守之心該督等接奉此旨密為存記遵照辦理惟當慎之又慎也

臣等謹案賊目莊錫舍悔罪投誠此即賊黨解散之機我

皇上不究其從賊之罪即賞以守備職銜并其屬下人等亦擇其出力者酌給以千把總外委等銜重賞出其意外踴躍感奮自倍尋常且足以廣招徠之路而又

密諭將來調往內地別省以杜後慮而靖人心時措咸宜之妙用豈淺見所能窺測乎

上又諭內閣曰此次賊匪有侵犯府城之信常青預先設法防堵於桶盤棧等衝要地方預派令遊擊蔡攀龍等各帶兵分割營盤相機堵剿籌畫調度俱合機宜逮賊匪分路攻犯府門常青率官兵鄉勇迎捕截殺斬獲甚多常青年逾七旬尚能如此勇往督戰朕心深為嘉獎伊係年老之人宣力海疆無親子在旁侍奉殊堪繫念著將伊子刑部筆帖式希明賞給三等侍衛馳驛前往臺灣省視並將賞給常青之御用

玉搬指等件即著伊子帶往以示優眷常青感激朕
恩益思奮勇迅能剿除賊匪永靖海疆朕必格外加
恩也至遊擊蔡攀龍前據孫士毅奏稱聞伊帶兵打
仗頗為賊匪所畏今據常青奏稱該遊擊於防守郡
城厯經打仗無不身先士卒且能審度機宜弁兵用
命義民悅服是以屢次均獲勝仗殲賊甚多甚屬奮
勇出力宜加恩擢蔡攀龍著照常青所請即起補臺
灣北路協副將仍加賞戴花翎若再能感激奮勇打

仗俟續有總兵缺出常青即奏請陞補以示獎勵其陣亡遊擊邱維揚把總余壽王澤高及陣亡受傷各兵丁均查明照陣亡例賞卹至鄉勇義民隨同官兵晝夜防範為國家禦賊實屬可嘉其殺賊立功者應遵照前旨拔補千總實缺其陣亡受傷者均著照兵丁之例加倍卹賞以示鼓勵此事總由黃仕簡任承恩二人互相觀望以致各鎮將效尤玩悞久稽歲事幸而朕及早料及預令常青前往臺灣督辦得以及

時整頓並將失陷城池私自回至郡城之總兵郝壯猷正法如此賞罰嚴明自必壁壘一新士氣振奮所有添調各處官兵日內諒已陸續到齊軍威壯盛料此么膺草竊無難一鼓殲擒膚功迅奏

二十九日

丙寅

李侍堯奏言三月二十日接常青來

札知臺灣急需兵接濟但查閩省營兵甚少又將弁多已出征惟有增調浙兵以資接濟即於三月二十二日奏請增調浙兵四千一面知會琅玕陳

大用迅速料理起程在案茲按奉

諭旨應即令浙兵停止但浙兵先起程者已陸續入閩
若行文停止再回本省延建各營調撥轉致緩不
及事至漳泉一帶現在情形不特洋面盜案頻聞
而臺灣到米日少糧價驟貴人情輕慄已有結夥
搶劫械鬪之案臣正在查辦並另籌平糶等事不
可不量留官兵以備緩急第現奉

諭旨增調本省駐防滿兵一千則浙兵四千殊覺過多臣

一面知會浙撫提臣將在途之陸路兵一千名及水師兵已起程者亦約有二千名令其催趲前來尚有未起程者即行截留一千名不必前進至滿兵一千恒瑞自即星速挑選臣一面知會徐嗣曾就近料理起程計月內俱可到泉州惟常青所奏增調官兵齊赴府城之處臣再四思維現在粵兵到府城者已有二千五百名其續至之一千五百名亦已登舟不日可到是府城兵已不少現據柴

大紀各稱前月二十九日逆匪林爽文率領大隊賊夥來攻諸羅柴大紀力戰竟日始行退去鹿仔港正近賊巢不能必其不來滋擾則普言保兵力殊覺單薄可慮臣於浙兵到泉州時仍先撥二千由蚶江配渡前往不惟足資堵禦兼可先行政剿以牽掣賊勢其滿兵一千及後到之浙兵一千仍由廈門前赴府城則常青處已有新兵六千加以舊有之兵幾及滿萬已足敷用可將南路賊匪迅

速掃除而北路先有重兵在彼攻剿迨常青向北
夾攻時更易於搗破賊巢擒捕逆首再臣自廈門
回至泉州後風聞漳浦平和一帶有奸匪滋事之
信隨密札提臣藍元枚以巡查口岸為名就近訪
察本月十四日接提臣札稱三月中有吳姓林姓
械鬪傷斃數命本月初四五等日又有浮山社民
許朴許忽許潛等糾集匪黨多人移尸各村藉端
搶奪等因查此事地方文武官俱未申報提臣到

彼始行訪出除嚴飭各該員弁上緊查拿並取諱匿不報各職名叅奏外已札提臣在彼酌量情形密拿妥辦至常青處現有恒瑞前往叅贊兼之陸廷柱梁朝桂等大員亦多似足供驅策今內地尤屬緊要臣謹札知提臣暫留漳浦如此案可以不動聲色即行竣事則仍令其速赴臺灣倘稍需時日臣即一面前往督辦并懇提臣留於該處商酌調度較為得力再先據臺灣道府等稟稱鹿仔港

一帶難民咸來避匿不下十萬餘人請撥米十萬石銀十萬兩照災賑例賑卹等因臣以臺灣遠隔重洋碾運維艱亦恐支用浮濫如果事在必需應就近稟請常青察核咨覆到日辦理是以駁飭但賊匪肆擾各路村庄俱遭焚搶農民不能耕種鹿仔港一帶較為寧謐咸來避匿臣於往來船戶細加訪詢其中竟有嗷嗷待哺亟須撫卹者若不速籌調劑轉恐無以仰副愛民如傷之盛心查閩地

民人向食番薯其切片成乾者一斤可抵數斤加
米煮粥即可度日隨飛飭司道先在泉州採買一
萬斤撥米二千石委員運解鹿仔港交與地方官
務查實在貧難男婦照依災賑粥廠之例設廠煮
粥散食仍在於上游延建一帶產有番薯地方再
採買數萬斤酌配米石陸續運往接濟如此量為調
劑不日剿匪事竣難民復業耕種自可不致失所
奏入

上命軍機大臣傳諭常青李侍堯藍元枚琅玕何裕城
曰前於初四日接到常青添調浙兵之奏朕因浙兵
向來柔懦不若福建駐防兵較為得力是以降旨將
浙兵停止派撥令恒瑞於駐防滿營內挑選一千名
親身統領其福建續調之綠營兵二千名即令藍元
枚統領赴剿次日復據李侍堯奏到閩省各營存兵
無幾未便再撥請於浙省兵協調四千名隨經降旨
令琅玕陳大用於溫衢等鎮揀派兵三千名赴閩合

之閩省駐防兵一千名以足原調四千名之數嗣又據琅玕奏所調浙兵業將提標及鎮海營兵停其調派其溫衢黃巖鎮兵三千名業已起身又據陳大用奏停派之提標鎮海營兵俱已在途現今將備緩行候旨各等語朕以征剿賊匪及分防要隘需用兵丁甚多不妨多多益善因降旨令琅玕等所有此項兵一千名倘已行入閩境即令前赴廈門交與李侍堯酌量派撥不必拘泥迴護是浙兵現已陸續赴閩李

侍堯發摺時未經接奉續降諭旨致有此奏耳現在
浙兵已到閩李侍堯奏請先撥二千名前往鹿仔港
其閩省滿兵一千及後到之浙兵一千仍由廈門前
赴府城之處俱屬妥協至前據李侍堯奏臺灣道府
稟請撥銀十萬兩米十萬石該督恐支用浮濫駁飭
不准之處所見錯謬已經降旨詳悉飭諭今李侍堯
以鹿仔港難民嗷嗷待哺酌籌調劑事宜是李侍堯
知過能改並不稍存迴護惟不及朕先見之速耳所

奏採買番薯一萬斤並撥米二千石為數無多恐不敷用著該督酌量情形多為預備陸續採辦運往以資口食設有不敷即再酌撥銀米速行不可仍前惜費致誤事機也現在兵數陸續加增鄉勇義民人數亦衆皆需按日支給口食現又有投順者二千餘人以及無食難民待哺情殷均不可不量給養贍自應寬裕接濟前已有旨令該督將該道府等所請銀米如數解運並令琅玕一體籌辦撥米十餘萬石由乍

浦海運至閩今思江西素稱產米之鄉且與閩省接壤著何裕城將該省倉穀即行碾米十餘萬石派員迅速運往福建應由何路運往及閩省由何處接收方為妥便之處並著何裕城札商李侍堯妥協酌量一面辦理一面奏聞其動撥倉穀於秋收後再行買補還倉至浙省現在撥運米十餘萬石如尚可設法購辦並著琅玕察看情形妥為籌畫一面咨會李侍堯陸續運往一面具奏俾兵糧民食均資寬裕再臺

灣向來一歲三熟是以產米甚饒足敷內地民食今
林爽文等滋事不法民皆失業農耒歸耕以致米無
所出常青於所過地方務須督令該道府等妥為安
輯詳悉曉諭該處百姓於收復處所即令其先行儘
力補種仍可收即不能接濟內地於本處民食亦
屬有益藍元枚前有旨授為叅贊令其前赴鹿仔港
督兵會剿該處現在只有普吉保一人在彼且正近
賊巢最關緊要其漳浦匪徒現在如已辦竣固屬甚

善倘尚須時日即著李侍堯前赴漳浦督辦自無難
迅就弋獲此時當以剿捕臺灣賊匪為重藍元枚自
當迅赴鹿仔港無庸在漳浦留滯也

臣等謹案督臣李侍堯訪知難民嗷嗷待哺情形
即撥米與番薯運往足資賑卹之用我

皇上猶慮不敷所需預令陸續解運深以惜費為戒恫
瘁在抱愛護之殷有加無已又以現在添兵并鄉
勇等皆須支給口食復傳

諭江西省亦撥米協濟並令浙江再為設法購辦

釐算精詳無不燭照數計故軍糈民食先時籌備悉寬裕有餘也

五月初一日

丁卯

李侍堯奏言現在浙兵由浦城入

閩者係衢州鎮兵一千名由福寧入閩者係溫州黃巖二鎮兵二千名適符

諭旨酌留溫衢兵之數尚不致浮多惟浙兵留閩協防仍挑閩兵進剿之處查閩兵在臺灣澎湖駐防既

調用一萬二千上年又調一萬一千前往征剿內地營兵實已無多此時零星攢湊兵力轉覺碎薄且領兵將弁益不敷用至常青到臺灣後所指調之金門銅山等營兵二千緣尚未得先調粵兵之信但取其地近廈門易於調集其實此等營分存兵甚少且係挑剩之兵若再於短中抽長轉恐不如浙省預挑備戰之兵較為得力又各營俱係沿海現因洋面盜案繁多飭令出洋分頭巡哨若換

以浙兵則人地生疎語音不通難以稽察是謹遵
令臣酌用之

諭旨仍催調溫衢等處官兵前來配渡進剿至提臣藍
元枚前因訪出林吳二姓械鬪及浮山社許姓搶
奪等事暫留漳浦查辦今據札稱許姓糾衆搶奪
被害者數村然不過無賴棍徒尚易辦理械鬪案
內多有天地會之人牽連長泰平和等縣奸匪此
時若即搜捕恐激成事端似宜暫且緩辦擬先將

搶奪一案辦完後星即趕來正可帶浙江後到之
兵前赴鹿仔港等語械鬪案內既多奸匪相連提
臣所商暫緩之處亦甚有斟酌且浮山等社係其
本鄉一切查訪搜拿較為真確便捷伊既稱搶奪
一案易於辦理即應令就近查辦至浙兵全數到
泉州尚需時日計提臣當已辦結仍可帶兵前赴
鹿仔港如尚不能速竣臣即親往督辦仍令提臣
到蚶江配渡亦不致遲悞奏入

上命軍機大臣傳諭常青李侍堯藍元枚柴大紀普吉保曰李侍堯所奏雖與朕昨降諭旨稍合但李侍堯之意尚欲俟械關之案辦完再令藍元枚帶領後到浙兵前赴鹿仔港為期不免過緩此時總以剿捕臺灣賊匪為要林爽文一經拿獲此等內地宵小餘匪辦之甚易現在臺灣北路止有柴大紀在諸羅普吉保在鹿仔港駐劄雖二人打仗尚知奮勉然普吉保到任未久於地方情形未能熟悉且不通閩省語音

遇有調遣官兵及曉諭鄉勇義民之處恐多未便不
如藍元枚之籍隸漳州又熟諳情形較為得力著藍
元枚即遵前旨迅速前赴鹿仔港無庸在漳浦留滯
如該處械鬪人犯尚未辦完李侍堯親往辦理自易
於完結可無藉提督之力也至所奏閩省內地各營
存兵甚少且係挑剩之後若再於短中抽長轉恐不
如浙省挑備戰兵可期得力之處所見亦是況浙省
兵丁不閩閩省情形若派令沿海巡哨人地生疎語

言不通於稽察洋面尤屬無益自不如逕令配渡進剿再現在臺灣額兵征兵陣傷脫亡者不少所有缺額何不趁此時即在內地召募充補使兵數足額巡捕既資充裕而該處游手好閑之徒亦可收歸卒伍更為一舉兩得李侍堯何以見不及此著該督即遵照妥辦或臺灣義民中願充兵者常青亦可召募補臺灣缺額之兵至常青尚須廓清後路再搗賊巢目下北路係專交柴大紀普吉保二人在彼辦理從前


黃仕簡任承恩身為提督一南一北互相推諉以致
遷延貽誤柴大紀普吉保未免因之觀望幸伊二人未
敢效尤已甚得免重戾今柴大紀現署水師提督普
吉保現署陸路提督非前此總兵可比昨據常青奏
柴大紀駐劄諸羅屢有勝仗並密札普吉保等相度
機宜留心堵剿等語賊匪既至諸羅滋擾鹿仔港與
大里代賊巢尤近自亦必有賊匪來擾普吉保如何
打仗殺賊何以俱未據隨時奏及著傳諭柴大紀普

吉保此時北路剿捕事宜係伊二人專責務須和衷商酌奮勉辦理一俟常青統領大兵到後會同犄角夾攻一舉蕺事毋得稍滋貽悞致蹈郝壯猷之覆轍

臣等謹按閩省赴剿之兵已二萬有餘其挑剔存營者甚少又各海口洋面需兵巡緝未便以浙省人地生疎之兵易調自屬實在情形第內地缺額甚多征兵之陣傷逃亡者亦不少現當剿匪未竣急宜設法補額我

皇上宵旰焦勞無事不勤

睿慮特諭督臣召募充補不特巡捕有資而游手之徒
收之卒伍即可為輯寧地方之計並令臺灣缺額
亦即在義民鄉勇中召補洵一舉兩得勵戎行而
輯奸暴計莫善於此也



欽定平定臺灣紀略卷十五